



Na osnovu člana 22 Statuta Brčko distrikta BiH – prečišćeni tekst (Službeni glasnik Brčko distrikta BiH, broj 2/10), Skupština Brčko distrikta BiH, na 30. redovnoj sjednici održanoj 23. maja 2018. godine, usvaja

ZAKON
O IZMJENAMA I DOPUNI ZAKONA O DJEČIJOJ ZAŠTITI
BRČKO DISTRIKTA BOSNE I HERCEGOVINE

Član 1

U Zakonu o dječijoj zaštiti Brčko distrikta Bosne i Hercegovine (Službeni glasnik Brčko distrikta BiH, broj: 51/11 – prečišćeni tekst i 03/15) u članu 2 stavu 1 iza riječi: „koja imaju” dodaje se zarez: „(,)” i riječi: „najmanje dvije godine od dana podnošenja zahtjeva.”

Član 2

U članu 8 stavu 1 tačka 1 mijenja se i glasi:

„1. naknada plate za vrijeme porodiljskog odsustva;“.

Član 3

U Poglavlju II. **PRAVA U OBLASTI DJEČIJE ZAŠTITE**, naziv odjeljka 1 mijenja se i glasi:

„1. Naknada plate za vrijeme porodiljskog odsustva“.

Član 3a

U članu 10 Zakona o dječijoj zaštiti Brčko distrikta BiH stav 2 mijenja se i glasi:

„(2) Materinski dodatak se isplaćuje u trajanju od dvanaest (12) mjeseci za svako novorođeno dijete u porodici, a za blizance u trajanju od osamnaest (18) mjeseci i iznosi 50% od prosječne mjesečne neto plate u Distriktu, utvrđene prema posljednjem objavljenom podatku od Direkcije za finansije Brčko distrikta BiH (u daljnjem tekstu: Direkcija) (u daljnjem tekstu: prosječna plata).“

Član 4

Član 11 mijenja se i glasi:

„Član 11

- (1) **Pravo na materinski dodatak, u skladu s ovim zakonom, ostvaruje se za novorođenu djecu u porodici u trajanju od 360 dana (12 mjeseci) od dana rođenja djeteta, a na osnovu podnesenog zahtjeva.**
- (2) **Rok za podnošenje zahtjeva je 30 (trideset) dana od dana rođenja djeteta.**
- (3) **Na zahtjev podnesen poslije roka iz prethodnog stava, pravo se ostvaruje od prvog dana u narednom mjesecu i traje do godine dana od rođenja djeteta.“**

Član 5

Član 12 mijenja se i glasi

„Član 12

(1) Pravo na pomoć za opremu novorođenčeta ostvaruje se bez izuzetka za svako novorođeno dijete u porodici, ukoliko roditelj ili staratelj novorođenog djeteta podnese zahtjev za ostvarivanje prava na opremu za novorođenče u roku od 180 dana (6 mjeseci) od dana rođenja djeteta.

(2) Uz zahtjev iz stava 1 ovog člana, podnosilac je dužan dostaviti i dokaz o prebivalištu u Brčko distriktu BiH u trajanju od najmanje dvije godine neprekidno do dana podnošenja zahtjeva i rodni list novorođenog djeteta.

(3) Nadzor nad ostvarivanjem ovog prava vrši Pododjeljenje za socijalnu zaštitu.

(4) Jednokratna pomoć za opremu novorođenog djeteta ostvaruje se u iznosu od 25% (dvadeset pet posto) od prosječne mjesečne plate u Brčko distriktu Bosne i Hercegovine.“

Član 6

Član 16 mijenja se i glasi:

„Član 16

Dječiji doplatk pripada djeci koja su smještena u ustanove dječije i socijalne zaštite i socijalno-obrazovne ustanove.“

Član 7

U članu 18 stavu 2 riječi: „ako nije smješteno u ustanovu socijalne zaštite“ brišu se.

Član 8

Član 21 mijenja se i glasi:

„Član 21

Djetetu bez oba ili jednog roditelja, djetetu bez roditeljskog staranja, porodici koja ima dijete ometeno u psihičkom ili fizičkom razvoju, porodici u kojoj su oba ili jedan roditelj invalidi od I. do VI. (završno sa VI.) grupe – kategorije i samohranom roditelju pripada pravo na uvećan dječiji doplatk, bez obzira na imovinske uslove, uvećan za 50% (pedeset posto).“

Član 9

Ovaj zakon stupa na snagu osmog dana od dana objavljivanja u Službenom glasniku Brčko distrikta BiH.

Broj: 01-02-390/18
Brčko, 23. 5. 2018. godine

PREDSJEDNIK
SKUPŠTINE BRČKO DISTRIKTA BiH

Esed Kadrić